

T'asina Fièrnu Ta!

Tantu hende ta hasi komo sifuera “fièrnu” ta un superstishon –algu ku no ta eksistí di bèrdat. Ma Beibel ta papia bon kla di un lugá di sufrimentu etèrno...asina kla ku maske kuantu bo ke ignor'è, bo no por! Kon Skritura ta deskribí fièrnu?

1) Hopi hende ta kòrda korektamente ku fièrnu ta un lugá di kandela. Segun Mateo 25:41, Dios lo bisa esnan destiná pa fièrnu: “*Apartá boso for di Mi, boso maldishonánan, bai den e kandela etèrno...*” Esnan na fièrnu lo “...wòrdu tormentá ku kandela i suafel... I huma di nan tormentu lo subi ariba pa tur etèrnidat...” (Revelashon 14:9-11).

2) Nos tur a yega di sinti set. Ma poko di nos sa kiko set mes mes ta. Fièrnu ta un lugá di set insasiabel. Segun Lukas 16:24, un hòmber na fièrnu a roga Abraham pa manda un persona pa “*e por dòp punta di su dede den awa i e freska mi lenga*”.

3) Fièrnu ta un lugá di doló, tristesa, i sufrimentu. E mesun hòmber na fièrnu a bisa: “*mi ta sufri di agonia den e vlam di kandela aki*” (Lukas 16:24). Revelashon 14:11 ta papia di hende na fièrnu: “*huma di nan tormentu lo subi ariba pa tur etèrnidat ...*” Ku frekuensia Hesus a deskribí fièrnu komo e lugá unda “*tin yoramentu i mordementu riba djente*” (Mateo 8:12).

Ora e kurpa humano ta eksperensia doló muchu pisá, e persona ta pèrdè tino. Na fièrnu, hende ta sufri doló insoportabel konsiente—sin nunca pèrdè tino—pa semper i semper.

4) Na entiero nos sa bisa “Deskanso”, “Sosegá na pas”. Sinembargu, si e defunto a bai fièrnu, esei no ta e kaso. Beibel ta bisa, “...nan no tin sosiegu di dia ni anochi...” (Revelashon 14:11). Hende na fièrnu no konosé sosiego, ni dia liber, ni wikent, ni fakansi...asta nan no por drumi anochi!

5) Segun Palabra di Dios, fièrnu ta un lugá di skuridat total. Hudus 13 ta bisa “...*pa kualnan e skuridat profundo a wòrdu reservá pa semper*”. Den otro palabra, fièrnu ta un lugá sukú sukú—bo no por mira nada nada! Imaginá ku bo ta eksplorá un kueba skur bo so. Tin hopi gang. Bo ta pèrdè kaminda i bo fleslait ta paga. Si bo por a mira un tiki klaridat na boka di kueba, esei lo yuda. Ma bo ta den skuridat total...bo no ta mira nada nada. Bo n’ sa unda bo ta bai, bo no por sali, bo ta desesperá! Esnan na fièrnu ta den skuridat total etèrno!

6) Fièrnu ta un lugá di isolashon. Segun Lukas 16:26, “...*entre nos (serka Dios) i boso (fièrnu) tin un presipisio grandi, asina ku esnan ku kier pasa for di akinan bai serka boso no por, ni ningun hende no por krusa pasa for di einan bin serka nos.*” Hende na fièrnu, hamas tin oportunitat pa enkontrá sernan kerí!

7) Fièrnu ta un lugá sin speransa. Pasobra e sufrimentu na fièrnu ta etèrno, por bisa ku na fièrnu no tin speransa. Charles Spurgeon a agregá, “Asta nan no tin speransa di muri.”

8) Skritura tambe ta laga sa ku fièrnu ta un lugá di kòrdamentu. Den Lukas 16, Abraham a rekòrdá e hòmber di su bida (16:25). El a kòrda ku e tin sinku ruman hòmber ku tambe ta na kaminda pa fièrnu (16:27).

Un di e horornan di fièrnu sigur lo ta e abilidad pa kòrda. Bo lo kòrda loke bo a hasi i bisa kontrario di mandamentu di Dios. Bo lo kòrda kuantu biaha bo a rechasá e oportunitat pa konfia den Hesu-Kristo so pa ser salbá for di fièrnu. Bo lo kòrda kuantu hende ta na fièrnu pa motibu di bo mal ehèmpel i mal konseho.

E teksto mihó konosí di Beibel ta bisa, “...*Dios a stima mundu asina tantu, ku El a duna Su Yu unigénito, pa ken ku kere den djE no bai pèrdí, ma tin bida etèrno*” (Juan 3:16). Beibel ta papia solamente di dos destino etèrno: “*pèrdí*” i “*bida etèrno*”.

Awor—mientras bo tin rosea—ta tempu pa tuma e paso importantísimo pa skapa e destino “pèrdí” etèrnamente na fièrnu i aseptá Dios Su oferta di “bida etèrno”. Si bo ta deseá mas splikashon kon pa tuma e paso aki, tuma kontakto libremente.